

**ANG****Bayan**

Pahayagan ng Partido Komunista ng Pilipinas
Pinapatnubayan ng Marxismo-Leninismo-Maoismo

Taon XXXV Blg. 4
Pebrero 21, 2004
www.philippinerevolution.org

Editorial


Marami pang liko't ikot ang daraanan ng usapang pangkapayapaan

Malisyoso, mapanlinlang, taksil. Ito ang mabibigat na salitang binitawan ni Luis Jalandoni, tserman ng *peace panel* ng National Democratic Front of the Philippines (NDFP) sa pagtatangka ng rehimeng Arroyo na lapastanganin ang kasunduan sa Oslo, Norway na kalalagda pa lamang ng *peace negotiating panel* ng NDFP at gubyerno noong Pebrero 14.

Ang kasunduan, na itinuturing na ika-11 mahalagang kasunduang pinirmahan ng dalawang *panel* mula nang masimulan ang usapang pangkapayapaan sa pagitan ng NDFP at GRP noong 1986, ay nilagdaan matapos ang apat na araw na negosasyon. Ito ang una sa serye ng mga pormal na usapan matapos itong suspendihin ng rehimeng Arroyo noong 2001.

Inilahad sa kasunduan ang kapasyahan ng magkabilang panig na isulong ang prosesong pangkapayapaan at harapin ang mga ugat ng armadong tunggalian. Sa partikular, pinagkaisahan ng dalawang panig na resolbahan ang usapin hinggil sa pagbabansag na terorista sa PKP, BHB at kay Jose Ma. Sison, punong konsultant ng NDFP *peace panel*. Gagawin ito alinsunod sa mga probisyon ng The Hague Joint Declaration, ng Joint Agreement on Safety and Immunity Guarantees (JASIG), ng Comprehensive Agreement on Respect for Human Rights and International Humanitarian Law (CARHRIHL) at iba pang bilateral na kasunduan sa nakaraan.

Bago umusad ang usapan, nagkaroon ng malaking



kontrobersya at mahigpit na gitgitan sa naturang pagkakalista na tumagal nang halos dalawang araw. Iginiit ng NDFP panel sa GRP panel na ang aktibong pangangampanya ng rehimeng Arroyo kaugnay nito ay taliwas sa diwa at nilalaman ng lahat ng dati nang paglabag sa pambansang soberanya ng bansa at taliwas sa diwa at nilalaman ng lahat ng dati nang pinirmahang kasunduan sa pagitan ng NDFP at GRP.

Sa pinirmahan nitong pinag-isang pahayag noong kalagitnaan lamang ng Enero, sumang-ayon ang GRP na gumawa ng mga ligal, pampulitika at diplomati-

**Mga tampok
sa isyung ito...**

**Mga aktibista ng kara-
patang-tao, pinaslang
ng militar**

PAHINA 4

**27 armas, nasamsam
ng BHB sa mga
taktikal na opensiba**

PAHINA 5

**Mumbai Resistance
2004**

PAHINA 11

kong inisyatiba para maalis sa listahan ng mga terorista ang PKP, BHB at si Kasamang Sison.

Subalit nang talakayin na ang puntong ito, tusong naghugas-kamay ang *panel* ng GRP at sinabing wala itong hurisdiksyon sa US at iba pang bansang nagmamantine ng gayong listahan. Umastang inosente ang GRP sa ginawa nitong pangangampanya sa US at Europe para isama sa listahan ng mga "dayuhang terorista" ang PKP, BHB at si Kasamang Sison sa layuning gipitin ang rebolusyonaryong kilusan sa Pilipinas, bigyang-daang ang tuwirang panghihimasok ng US laban sa rebolusyonaryong kilusan dito at pilitin ang PKP at BHB na magsalong ng armas at sumurender sa GRP.

Mas masahol pa, inatasan ng Malakanyang ang *peace panel* ng GRP na ilihis ang pag-uusap tungkol dito at ibaling ito sa pagpapatigil sa patakaran ng rebolusyonaryong kilusan hinggil sa Permit to Campaign (PTC), pagpapatigil sa mga taktikal na opensiba ng BHB at pagpapasuko sa mga pwersa at armas ng hukbong bayan.

Sa pagtatangka nitong makala-

mang, malusutan ang responsibilidad nitong bawiin ang pagbansag at maibaling ang responsibilidad sa PKP, iginiit din ng GRP ang katawatawang kundisyon na kailangang magbigay ng "ligal at moral na batayan" ang Partido, BHB at si Kasamang Sison kung bakit hindi dapat ituring na terorista ang mga ito. Hindi na kailangan pang patunayan ng Partido at hukbong bayan na taliwas ang pagkakalis-tang ito sa mga prinsipyo ng rebolusyon at maka-mamamayang katangian at sa praktika ng PKP at BHB.

Sa kabila ng lahat ng pagtatangka ng GRP na ipihit ang mga pangyayari at paluhurin ang NDFP, nanaig ang prinsipyadong paninindigan ng NDFP. Sumang-ayon din ang GRP na gumawa na ng ilang diplomatikong hakbang, kabilang ang paghiling nito sa gubyrno ng Norway na kumbinsihin ang mga alyado nitong tanggalin sa "listahan ng mga terorista" ang PKP, BHB at si Kasamang Sison.

Gayunpaman, kababalik pa lamang ng *panel* ng GRP sa Maynila ay agad ipinahayag ni Teresita Quintos-Deles, Presidential Adviser



on the Peace Process, na hindi tutupdin ng GRP ang naturang obligasyon.

Mariing binatikos ni Jalandoni ang GRP sa patuloy nitong pagbibigay-katwiran sa mga paglabag ng US sa pambansang soberanya ng Pilipinas sa pamamagitan ng pag-agaw ng hurisdiksyon sa mga rebolusyonaryong entidad at pangyayari sa Pilipinas at panghihimasok at paglapastangan sa mga usapan at kasunduan sa pagitan ng GRP at mga rebolusyonaryong pwersa.

Sa loob ng GRP, pangunahin sa mga nanghihimasok at sumasagka sa prosesong pangkapayapaan ang mga militaristang papet ng US sa Malakanyang at AFP tulad nina Defense Secretary Eduardo Ermita at mga kontra-rebolusyonaryong tipo ng mga sosyal-demokrata tulad ni Deles. Habang pinipilit ni Deles na karapatan ng US ang paglilista, sinasabi naman ni Ermita at ni Lt. Col Daniel Lucero, tagapagsalita ng Armed Forces of the Philippines, na ang pagtatanggal ng PKP-BHB sa listahan ay makasasagka sa kampanya ng AFP para mapawi ang mga operasyon at impluwensya ng PKP-BHB sa kanayunan.

Kung lalabas na walang saysay at babastusin lamang ng GRP ang mga kasunduan sa Oslo at iba pang kasunduan, laluna ang probisyon

 <p>Taon XXXV Blg. 4 Pebrero 21, 2004</p> <p>Ang <i>Ang Bayan</i> ay inilalabas sa wikang Pilipino, Bisaya, Iloko, Hiligaynon, Waray at Ingles.</p> <p>Maaari itong i-download mula sa Philippine Revolution Web Central na matatagpuan sa: www.philippinerevolution.org.</p> <p>Tumatanggap ang <i>Ang Bayan</i> ng mga kontribusyon sa anyo ng mga artikulo at balita. Hinihikayat din ang mga mambabasa na magpaabot ng mga puna at rekomendasyon sa ikau-unlad ng ating pahayagan. Maaabot kami sa pamamagitan ng email sa: angbayan@yahoo.com</p>	
<p>Nilalaman</p>	
Editoryal	1
Mga kinatawan sa JMC, hinirang	3
Mga aktibista, pinaslang ng militar	4
Karahasan sa eleksyon	4
Mga taktikal na opensiba	5
Pagpaparami ng mga guro	6
Ka Basil	8
Mapait ang asukal sa Negros	10
Mumbai Resistance 2004	11
Balita	12

Ang *Ang Bayan* ay inilalathala dalawang beses bawat buwan ng Komite Sentral ng Partido Komunista ng Pilipinas

hinggil sa pagpapatanggal sa PKP-BHB at kay Kasamang Sison sa listahan ng mga "terorista," mawawalan ng batayan para ipagpatuloy pa ang negosasyong pangkapayapaan.

Katulad ng naganap sa katatapos nitong serye, asahan natin ang marami pang pagpihit at salimuot sa proseso ng usapang pangkapayapaan at mahigpit na pakikitunggali sa reaksyunaryong gubyrerno sa larangang ito ng pakikibaka, kasabay ng patuloy na pagsusulong ng matagalang digmang bayan hanggang sa makamit na natin ang lubos na tagumpay.

Patuloy na mahigpit nating pinanghahawakan ang armadong pakikibaka bilang pangunahin at pinakamapagkakatiwalaang paraan ng rebolusyunaryong pakikibaka at ang hayag na pakikibakang masa at parlamentaryong pakikibaka bilang napakahalaga ring sekundaryong paraan ng pakikibaka. Kaalinsabay, nagpupursige at nananatiling bukas tayo sa pakikipagnegosasyong pangkapayapaan bilang dagdag na larangan ng pakikibaka, hangga't bukas din at may kapasuhan ang kabilang panig na makipag-usap at makipagkasundo. Kung walang gayong kapasuhan ang rehimeng Arroyo, handa ang NDFP na hintayin na lamang ang hahalili ritong rehimen na maaaring may mas malaking interes na isulong ang prosesong pangkapayapaan.

AB

Mga pakinabang ng mamamayan mula sa kasunduan sa Oslo

Sa kabila ng mga pihit sa katatapos lamang na yugto ng prosesong pangkapayapaan, mayroong mga taktikal na tagumpay na nakamit ang PKP, NDFP at rebolusyunaryong kilusan sa seryeng ito na maaaring



Bubuuin na ang Reciprocal Working Committees on Social and Economic Reforms na siyang maghahanda ng burador para sa ikalawang paksa sa substantibong adyenda ng usapang pangkapayapaan.

pakinabangan ng mamamayan, maliban na lamang kung garapalang labagin ito ng GRP.

Sa minimum, pakikinabangan ng mamamayan ang kasunduan sa Oslo sa pamamagitan ng inaasahang pagpapalaya ng mahigit 300 bilanggong pulitikal, indemnipikasyon ng 10,000 biktima ng batas militar (alinsunod sa listahang dati nang isinumite ng NDFP) at pagtatayo ng Joint Monitoring Committee para magsilbing daluyan ng mga reklamo ng milyun-milyong mamamayang biktima ng militarisasyon, mga abusong militar at iba pang paglabag sa kanilang karapatang-tao.

Muli ring pinagtibay ang The Hague Joint Declaration ng 1992 bilang balangkas sa usapan sa halip na ang panukalang Final Peace Agreement na unilateral na binalangkas ng Malakanyang para magsilbing kasunduan ng pagsuko. At pinalaki ang papel at naging mas aktibo ang gubyrerno ng Norway bilang ikatlong partido sa usapan, bagay na nagsisilbing pagkilala sa *belligerency status* ng NDFP.

Maaaring makakuha pa ang mamamayan at rebolusyunaryong kilusan ng karagdagan pang tagumpay batay sa tatakbuhi ng mga susunod pang serye ng usapan.

AB

Mga kinatawan sa JMC, hinirang

Kumpleto na ang mga kinatawan ng NDFP at GRP para sa bubuuing Joint Monitoring Committee (JMC). Ang pagbubuo ng JMC ay alinsunod sa nakasaad sa Comprehensive Agreement on Respect of Human Rights and International Humanitarian Law (CAR-HRIHL). Ang komite na ito ang nakatakdang sumubaybay sa implementasyon ng kasunduan at tumanggap ng mga reklamo kaugnay ng mga ito.

Hinirang ng NDFP sina Kasa-

mang Fidel Agcaoili, Coni Ledesma at Danilo Borjal bilang mga kinatawan ng NDFP habang pinili ng GRP sina Rene Sarmiento, Jose Luis Martin Gascon at Risa Hontiveros-Baraquel upang kumatawan sa GRP.

Hinirang din ng NDFP sina Obispo Maximo Tomas Millamena ng Iglesia Filipina Independiente at si Marie Hilao-Enriquez ng KARAPATAN at SELDA (Samahan ng mga Ex-Detainees Laban sa Detensyon at para sa Amnestiya) bilang

mga tagapagmasid. Sa panig ng GRP, tinukoy sina Mercy Contreras at Aileen Bacalzo.

Inaasahang pormal na mabubuo ang JMC sa unang pagpupulong na nakatakdang idaos sa loob ng 90 araw. Gayunpaman, makikita pa sa proseso kung gaano ito kaepektibo at hanggang saan ito maipapatupad laluna't walang anumang paghahanda rito ang reaksyunaryong gubyrerno at walang interes ang AFP na ipatupad ito.

AB

Mga aktibista para sa karapatang-tao, pinaslang ng militar

Lalong nagiging walang pakundangan at malupit ang pasistang militar sa pagsasagawa nito ng kontra-rebolusyonaryong digma. Nitong Pebrero, brutal na pinatay ang tatlong aktibistang nagtataguyod sa karapatang-tao at lumalaban sa militarisasyon sa Mindoro.

Noong Pebrero 13, pinatay si Juvy Magsino, Vice Mayor ng Naujan, Oriental Mindoro at tagapangulo ng Provincial Justice and Peace Council at ang kasama niyang si Leima Fortu, Secretary-General ng Karapatan-Oriental Mindoro. Matapos harangin at paulanan ng bala ang kanilang sasakyan sa Pinasabangan-2, Naujan, malapitan silang binaril ng pinaniniwalaang mga tauhan ng 204th Brigade ng Philippine Army. Naganap ang pamamaslang kalahating kilometro lamang mula sa kampo ng 204th Brigade.

Nitong Pebrero 18, dinukot ng pitong pinaghihinalaang militar si Adrian Alegria ng Sta. Cruz, Mindoro Occidental, isang aktibistang nangangampanya laban sa militarisasyon sa Mindoro, sa kanilang bahay sa Barangay Lumang Bayan, Sta. Cruz bandang 2:30 ng madaling araw. Kinaumagahan, natagpuang lumulutang ang kanyang bangkay sa Amnay River sa bayan ng Sablayan. Bakas sa kanyang katawan ang pinagdaanan niyang tortyur bago siya pinatay. Nagtamo siya ng isang tama ng bala sa dibdib at sa isa pa sa batok na tumagos sa kanyang mukha. Pitong beses siyang sinaksak.

Sina Magsino, Fortu at Alegria ay pinakahuli lamang sa pahaba nang pahabang listahan ng mga biktima ng karahasang militar hindi lamang sa Mindoro kundi sa buong bansa.

Mariing kinundena ng Partido Komunista at buong rebolusyonaryong kilusan ang pagpatay kina Magsino, Fortu at Alegria. Muling pinatatampok nito ang duma-

raming kaso ng mga pagpatay sa mga aktibistang nagtataguyod sa karapatang-tao. Noong nakaraang taon, dinukot at pinatay ng mga pinaniniwalaan ding tauhan ng 204th Brigade sina Eden Marcellana, Pangkalahatang Kalihim ng Karapatan-Southern Tagalog at Eddie Gumanoy, Tagapangulo ng Kasama-TK sa bayan din ng Naujan.



Juvy Magsino

Ipinakikita ng mga pangyayaring ito na ibayong nagiging malupit at walang pili ang karahasang militar sa desperasyong lupigin ang patuloy na sumusulong na rebolusyonaryong armadong kilusan. Galit na galit ang Armed Forces of the Philippines sa mga aktibistang naglalantad sa mga pang-aabusong militar at paglabag sa karapatang-tao ng mamamayan at nagtataguyod ng mga progresibo at makamamayang interes.

Mismong si Arroyo ang naghihikayat sa walang habas na pananalanta ng militar sa Mindoro. Sa kabilang ng napakaraming reklamo laban sa militar, pinarangalan ni Arroyo si Col. Jovito Palparan, ang berdugo ng Mindoro at dating kumander ng 204th Brigade. Mula 2001, ang 204th Brigade ang responsable sa napakahaba nang listahan ng pagsalbeyds, pagtortyur, mga iligal na pag-aresto, pwersahang pagpapalikas, harasment, pang-aabuso sa mga karapatan ng mga bata at mga pang-aabuso laban sa kababaihan.

Sisikapin ng Partido at ng BHB na mabigyang-katarungan ang mga pagpatay na ito sa pamamagitan ng pagparusa sa mga salarin at paglulunsad ng mga taktikal na opensiba laban sa militar. AB

Karahasan laban sa mga progresibong kandidato at partido

Sa iba't ibang panig ng bansa, puspusang hinahadlangan ng mga pasista ang pagtakbo ng mga progresibong kandidato at partido sa eleksyon.

Muli itong pinatunayan ng walang pakundangang pagpatay kina Magsino, Fortu at Alegria, pawang mga kilala hindi lamang bilang mga tagapagtaguyod ng

karapatang-tao kundi bantog ring mga kasapi ng mga progresibong partidong lumalaban ngayon sa reaksyunaryong pulitika.

Sina Magsino at Fortu ang ika-36 at ika-37 myembro ng Bayan Muna na pinatay ng mga pasistang pwersa simula nang lumahok ito sa reaksyunaryong eleksyon noong 2001.

Bilang pangkalahatang kalihim ng Karapatan at *coordinator* ng Bayan Muna-Calapan City, hinarap ni Fortu ang maraming banta sa kanyang buhay.

Si Magsino naman ay tumatakbo bilang meyor ng Naujan. Takot na takot ang mga pasista na makaupo si Magsino bilang meyor lalupa't

sundan sa "Bugso..," pahina 5



27 armas, nasamsam ng BHB

Hindi bababa sa 27 armas ang nasamsam ng BHB mula sa kaaway sa loob ng nakaraang tatlong linggo.

Masbate, Pebrero 16. Tinambangan ng mga Pulang mandirigma sa ilalim ng Romulo Jallores Command ang mga tropa ng 506th PNP Provincial Mobile Group sa Barangay Bagtas, Milagros, Masbate. Bandang 2:30 ng hapon nang ang *convoy* ng pinagsanib na tropa ng PNP at Scout Rangers ay tamaan ng *command-detonated land mine* (eksplisibong itinanim sa lupa at kailangang sadyang pasabugin.) Siyam ang patay, kabilang si Sr. Insp. Santiago Tacordo Jr. at tatlo ang malubhang nasugatan sa panig ng 12-kataong PNP.

Ilocos Sur, Pebrero 16. Sinalakay ng BHB ang isang Special Operations Team (SOT) ng 50th IB na humimpil sa Barangay Hall ng Quibit-Quibit, Sinit. Napatay ang timlider nitong sarhento habang sugatan ang tatlong korporal.

Negros Occidental, Pebrero 15. Nilusob ng mga kasapi ng Boy Gatmaitan Command ng BHB-Negros ang detatsment ng CAFGU sa Barangay Mahalang, Himamaylan City. Nasamsam ng mga gerilya ng BHB ang tatlong M14 at tatlong garan bago sila umatras. Dalawang Pulang mandirigma, sina Ka Ricky

Agrava at Ronnie Chavez ang namatay sa labanang ito. Walo ang sugatan sa panig ng AFP.

Compostela Valley, Pebrero 14. Sinalakay ng walo-kataong yunit ng BHB ang "Linda" Detachment ng 1102nd Police Provincial Mobile Group sa Barangay Fatima, Nabunturan. Napatay ang isang pulis sa unang bugso ng putukan. Isa pang elemento ng CAFGU ang namatay habang dinadala sa ospital. Nasugatan ang isa pang pulis at isang babae na noo'y nasa loob ng detatsment. Nag-alay ng buhay ang isang gerilya ng BHB sa taktikal na opensibang ito.

Nakasamsam ang mga Pulang mandirigma ng tatlong M16, dalawang M14 at isang .45 pistola.

Quezon, Pebrero 9. Inambus ng BHB ang *deputy chief* ng Mauban PNP noong Pebrero 9 sa mismong sentro ng bayan. Ayon sa pahayag ng Apolonio Mendoza Command, si SPO3 Paulino Mancenido ay protektor ng iligal na droga, iligal na *logging* at ekstorsyon.

Kalinga, Pebrero 6. Sumuko matapos masorpresa ang mga elemento ng CAFGU sa ilalim ng 77th IB nang salakayin ng isang platun ng BHB ang kanilang kampo sa Barangay Limos, Pinukpuk noong

Pebrero 8. Sa unang bugso ng mga putok, kumaripas ng takbo ang mga nasorpresang mga elemento ng Philippine Army at CAFGU habang nasugatan ang dalawang paramilitar. Nakakumpiska ng 13 ripleng M14 na may 1,319 bala, 1 Garand na may 81 bala at isang Motorola VHF radyo. Bago umatras, sinunog ng BHB ang kampo ng kaaway.

Cagayan, Pebrero 1. Limang sundalo ng 17th IB at isang elemento ng CAFGU ang agad na namatay sa unang bugso ng putukan nang ambusin sila ng Danilo Ben Command ng BHB sa kanlurang Cagayan. Naklining din ang isang M16 sa pananambang na inilunsad sa Barangay Illuru Sur, Rizal.

Nagpapatrulya ang mga tropa sa mga baryo ng Rizal, Piat, Sto. Niño at Lasam nang tambangan sila ng BHB.

Oriental Mindoro, Enero 25. Isang platun ng BHB ang matagumpay na nakipagsagupaan sa mga tropa ng 19th Special Forces Company sa Sityo Gumatos, Barangay Hagan, Bongabong. Nasukol sa *ambush site* ang mga sundalo nang habulin ng mga ito ang isang kasama na nagsilbing pain. Napatay ang tatlong elemento ng SFC habang ilan pa ang nasugatan.

AB

"Bugso..." mula sa pahina 4

madali niyang maipapanalo ang darating na eleksyon dahil sa kanyang paninindigan para sa progresibo at makabayang interes ng mamamayan. Tanda ng lakas ng kanyang kandidatura ang pagsuporta sa kanya maging ng mga pulitikong kabilang sa Lakas-CMD.

Si Alegria naman ay lider ng mga kabataang magsasaka at *coordinator* ng Anakpawis sa Sta. Cruz, Mindoro. Katulad ng Bayan Muna, na kapatid na partido nito, ang Anakpawis ay pinag-iinitan din ng militar. Mahigpit na tinitiktikan at hinaharas ang mga

organisador at myembro nito.

Noong Pebrero 2, arbitraryong inaresto, ininteroga at idinitine ng mga elemento ng 61st IB ang tatlong organisador ng Bayan Muna at AnakBayan sa Barangay Molobolo, Cauayan sa Negros. Sina Isabel Necesario na kasapi ng AnakBayan, Julia Tabat na kasapi ng Bayan Muna at si Medardo Sayosa, isa ring kasapi ng Bayan Muna, ay tinamnan ng mga bala at dokumento, at karakarakang pinaratangang mga myembro ng BHB.

AB




Pagpaparami ng mga guro ng rebolusyon sa Camarines Sur

Para makabig sa rebolusyon ang ilampung milyong magbubukid sa malawak na malapyudal na kanayunan, di mapasusbalian ang kahalagahan na makapagpalitaw ang Bagong Hukbong Bayan (BHB) at mga rebolusyonaryong organisasyong masa ng mga instruktur. Noong isang taon, pinagsikapan ng isang platun sa isa sa mga larangang gerilya ng Camarines Sur na palakasin ang makinaryang pang-edukasyon sa erya nito. At napakaganda ng naging resulta.

Nang magtasa ang platun noong Hunyo, itinanong ni Ka Nell, ang upisyal pampulitika at siyang may responsibilidad na manguna sa gawaing pang-edukasyon, kung "ano pa ba ang pwede nating gawin?" Ang saklaw ng yunit ay binubuo ng ilampung libong mamamayan sa mga barangay sa bulubunduking mga lugar, sa kapatagan at baybayin. Mabunga ang gawaing pagpapalawak at konsolidasyon, na nakapagpausbong ng mahigit isandaang grupong pang-organisa, komiteng pang-organisa at ganap na samahang masa. Ngunit dahil banat na banat na ang siyam na instruktur mula sa platun at ilang dosenang instruktur mula sa mga lokal na organisasyong masa, maraming hindi natutupad na target sa pagbibigay ng mga batayang kursong masa.

"Napakahalaga pa naman," pagdidiin ni Ka Nell, "ng mga kursong masa para pag-alabin ang inisyatiba at mas aktibong paglahok sa rebolusyonaryong gawain at mga pakikibaka." Idinagdag ni Ka Mel, platun lider at inuuban nang



beterano mula pa noong dekada 1980, na: "Isa sa mga aral na nahalaw sa dating mga pagkakamali ay ang pagiging napakaimportanteng salik ng pampulitikang kamaayan ng ating mga organisasyong masa para sila'y tunay na mag-isip at kumilos bilang rebolusyonaryo. Napakahalaga ng ating gawaing pang-edukasyon." Ibinahagi rin ni Ka Mark, isang matagal nang lider ng Partido at kilala bilang napakasensyoso at napakasipag na instruktur, na ang kanilang sangay ng Partido sa lokalidad ay maaari sanang makapaglunsad ng mas marami pang pag-aaral kung mayroon lang silang mas marami pang mga teksto.

Noon din ay tinukoy ang kasalukuyang makinaryang pang-edukasyon ng teritoryo, tinasa ang mga kahinaan nito at nagbalangkas ng plano para palakasin ang napakahalagang Pambansa-Demokratikong Paaralan sa erya.

Kagyat pagkatapos ng pagtataasa ay nagdaos ng Pagsasanay para sa mga Instruktor ng Kursong Masa (PIKM) para sa mga instruktur mula sa hanay ng mga buong-panahong Pulang mandirigma at mga lokal na organisasyong masa. Ang mga nagorganisa ng pagsasanay ay dinagsa ng mga kahilingan para makadalo dahil nang una itong ianunsyo, sinabing bukas ito kapwa sa mga baguhang instruktur at mga nagnanais maging instruktur. Gaya ng maraming iba pang katulad na aktibidad, hindi kinayang pagbigyan ang lahat at kinailangang rendahan ang kasabikan ng mga kasama at masa dahil sa mga konsiderasyon sa seguridad at lohistika.

Matagumpay na naidaos ang dalawang linggong pagsasanay na dinaluhan ng mga nagmula sa platun, kalapit na mga yunit gerilya at mga lokal na organisasyon. Natatawang ikinwento ni Ka



Sammy, isa sa mga instruktur, na: "Nahihiya pa ang mga kasama noong una pero nang umabot na kami sa praktikum sa bandang dulo ng pagsasanay, halos kailangan nang awatin ang lahat dahil ayaw na nilang magkasya sa pagbibigay lamang ng maiikling bahagi ng mga kurso bilang praktis!" Pinalawig ang pagsasanay para magkaroon ng dagdag na panahon para sa praktikum, dahil aniya, "dapat lang na sunggaban at payabungin ang gayong uri ng kasiglahan."

Ipinasya rin na ang mga baguhang instruktur ay magbibigay ng mga pagsasanay sa pamamagitan ng *buddy system* kung saan paghahatian ng dalawa o tatlo sa kanila ang isang kurso. Tahimik silang subaybayan ng isang mas makaranasang instruktur habang sila'y nagtuturo at agad magdaraos ng pagpuna at pagpuna-sa-sarili pagkatapos para makita ang mga kalakasan at kahinaan. Dati nang pinadali ng PIKM ang ganitong mga *on-the-job training* sa pamamagitan ng pagpapataas sa kumpanya ng mga baguhang instruktur at pagbibigay sa kanila ng paunang tangkas ng mga *lesson plan*, tulong biswal at mga pangkulturang pagtatanghal.

Mahalagang salik sa pagpapadali ng pagsasanay ang pagbaling mula sa mga sandatahang yunit pampropaganda tungo sa platun bilang batayang pormasyon. Ngayon, mas madali para sa mga mas abanteng kadre na magsanay ng bago pang mga instruktur. Ang mga baguhan ay tinutulungan ng mga mas sanay na pangibabawan ang kanilang mga kaba. Naaalala ni Ka Paulo, na nakatapos lamang ng ikatlong grado subalit nangangahas magturo ng Maikling Kurso sa Lipunan at Rebolusyong Pilipino (MKLRP), kung papaano dati siyang naninigas sa takot sa harapan ng

klase, na para bang gusto na lang niyang magtago sa likod ng tekstong tangan niya. Sa mga panahong iyon, aniyang nakangiti, "ang mga tango at ngiti mula sa isang kasama sa likuran ang nakapagpalakas ng aking loob."



Labas sa mga aktwal na sesyon, hinihikayat ang mga talakayan hinggil sa batayang rebolusyonaryong teorya at prinsipyo para mapatalas ang pag-unawa ng lahat sa mga ito. Inamin ng pangalawang platun lider at kung minsang masyadong seryosong si Ka Charlie, na "ang totoo, nalalaman mo kung gaano na kalalim ang pag-unawa ng mga kasama sa rebolusyonaryong teorya kapag ispontanyo na silang nakapagbibiro mula rito." Pangiti rin niyang binanggit ang isa pang bentahe—nagiging mas tahimik ang mga kampo dahil mas pinipili na lang ng ibang medyo pilyong mga kasama na magbasa. "Syanga pala, kailangan pa naming pabweluhin nang husto ang aming programa sa literasi sa loob ng yunit at harinawa'y magagawa ito sa malapit na hinaharap," dagdag niya.

Pinagsikapan din ng platun na magpalitaw ng mas marami pang teksto at tulong biswal. Sa tulong ng mga alyado sa syudad, nakapaglimbag sila ng may 50 libro kung saan tinipon ang mga batayang kurso. Ang kalahati nito'y may sukat na 8 1/2" x 11", inilimbag gamit ang malalaking letra at ibibigay sa mga lokal na instruktur; at ang nalalabi ay mga librong sangkapat lamang nito ang laki at madaling isilid sa mga bakpak ng mga Pulang mandirigma. Ang mga biswal para sa mga kurso ay iginuhit sa kartolina at mga lumang kalendaryo gamit ang *pentel pen* at pinatibay sa pamamagitan ng pagteyp sa mga gilid nito, o kaya inimprenta sa tela sa pamamagitan ng *silkscreen*. Nakapag-apon din ng mga mapa, retrato at pati isang *inflatable globe* (modelo ng mundo na hinihipang parang lobo).

Pagsapit ng katapusan ng taon, may sapat nang kumpanya ang kalahati ng platun na magturo ng kahit ilang batayang kursong masa. Bukod pa ito sa solidong bag-as ng platun na may kakayahang magturo kahit ng mga mas abanteng kursong pampartido. Hindi na problema ang kakulangan ng mga instruktur kahit magdispers pa ang platun sa mga iskward para maggawaing masa sa malawak na erya. Ibayong lumakas ang mga komiteng pang-edukasyon ng mga lokal na rebolusyunaryong organisasyong masa, na siyang gulugod ng makinaryang pang-edukasyon ng teritoryo.

Kapansin-pansin din ang mas mataas na antas ng kumpanya ng yunit sa gawaing propaganda. Hindi na tinapos ni Ka Ren ang ikaanim na grado para mapagbigyan

Sundan sa "Pagpaparami...", pahina 8



Ka Basil, dakilang rebolusyonaryo

"Masasabing ang kasaysayan ni Ka Basil sa rebolusyon ay kasaysayan na rin ng buong Timog Katagalugan. Lahat ng ikot, liko at igpaw ng rebolusyon sa rehiyong ito ay nalahukan niya. Lahat ng mapapait na yugto ng pagkilos, pag-ibig at pagpapamilya ay naranasan niya rito. Gayundin, ang masasayang panahon at matatamis na tagumpay sa pagsusulong ng rebolusyon ay nadama niya rito." —Ka Higom Maragang

Noong Pebrero 6, namatay si Mabini Permalu Fabon, 52, kilala bilang Ka Basil, Ka Romy, Ka Andoy, Ka Benny, Ka Albert, Ka Bitoy at nitong huli, Ka Apolinario, habang ihinahatid sa Batangas upang ipagamot ang di inaasahang malalang karamdaman. Isa si Ka Basil sa mga rebolusyonaryong pinakamatagal na nagsilbi sa Southern Tagalog. Salamin ang kanyang buhay ng kasaysayan ng rebolusyonaryong kilusan ng rehiyon.

Kasapi ng Kabataang Makabayan (KM) si Ka Basil nang ipataw ang batas militar noong 1972. Kabilang siya sa 15 aktibista na nagkusang tumungo sa kanayunan ng Cavite upang mag-organisa sa masa roon at hanapin ang Bagong Hukbong Bayan. Noong 1974, sa pamamagitan ng pambansang pamunuan ng KM na patuloy niyang nauugnayan, sumumpa siya bilang kandidatong kasapi ng Partido. Namuhay siya sa mga bulubunduking

bahagi ng Cavite at malalim na umugat sa hanay ng mga magsasaka roon hanggang 1976. Ginamit niya ang mga dokumento ng Partido bilang gabay sa pag-oorganisa habang naghihintay na maugnayan ng BHB. Nakasanib siya sa BHB sa Quezon-Bicol Zone (QBZ) pagsapit ng Disyembre 1976.

Naitalaga siya sa Tagkawayan, Quezon noong 1977 at dito niya lubusang natutunan ang pagpapalawak at pagpapatatag ng isang larangang gerilya alinsunod sa estratehiya ng matagalang digmang bayan. Sa panahong ito nasaklaw ng pagkilos ng BHB ang kalaparan ng QBZ at inabot nito sa unang pagkakataon ang mga bayan ng Ragay at Lupi sa Camarines Sur. Malaki rin ang itinulong ni Ka Basil sa pagpapaunlad ng gawain sa edukasyon at pinaunlad niya ang paggamit ng mga tulong biswal para mas madaling maunawaan ng mga magsasaka. Sa panahon ding ito naging ganap na kasapi ng



Partido si Ka Basil.

Panandalian siyang itinalaga sa gawaing propaganda noong 1980 kung saan pinangasiwaan niya ang paglalabas ng *Kalatas*, ang rebolusyonaryong pahayagan ng rehiyon. Ngunit sa taon ding ito ay inilipat siya sa yunit pang-organisa sa hangganan ng Batangas-Laguna-Quezon upang palawakin ang saklaw ng BHB doon. Matagumpay na nabuksan ng BHB ang Lipa, Padre Garcia, Rosario, Taysan, San Juan at Lobo sa silangang Batangas sa kabila ng matitinding operasyon ng AFP.

Ngunit dumanas ng matitinding hagupit ang yunit na kinapa-

sundan sa "Ka Basil...", pahina 9

"Pagpaparami...", mula sa pahina 7

ang kanyang pinakabatang mga kapatid na nagsisimula pa lamang mag-aral. Ngunit aniya, na tila may pagkamangha pa rin sa sarili, "kung minsan matagal akong nakikipagtalakayan tungkol sa mga pambansang isyu sa mga titser at negosyante o tungkol sa reporma sa lupa sa mga magsasakang pwede ko nang maging lolo."

Sa unang tingin, mukhang ang mga titser ng BHB at ROM ay nalilimitahan ng mababang antas na inabot ng pormal na edukasyon. Dahil ang malaking mayorya

sa mga kasama ay nagmula sa naghihikahos na masang magsasaka, marami sa kanila ang napilitang tumigil sa pag-aaral sa murang edad para tumulong sa bukid o sa simpleng dahilan na hindi kayang tustusan ng kanilang pamilya ang kanilang pag-aaral. Subalit malayo ang mararating ng lubos na determinasyong bunga ng rebolusyonaryong diwa. Para sa marami, kinailangan lamang palakas ang kumpyansa na sumubok man lamang muna upang matanto na tunay palang maaari silang maging mahuhusay na instruktur ng rebolusyon.

AB

"Ka Basil...", mula sa pahina 8

looban ni Ka Basil. Noong 1982, nakubkob at nadurog ang yunit na ito sa Lipa. Tanging si Ka Basil at isa pang mandirigma ang nakaligtas. Gayunpaman, hindi nabawasan ang pagpupursige at kasigasigan ni Ka Basil.

Sa panahong ito sineryoso niya ang pag-aasawa at pagtatayo ng pamilya sa balangkas ng kanyang pagkilos sa kanayunan. Ikinasal sila ng kanyang kasintahan noong Marso 29, 1985 sa isang kweba sa Bundok Banoy sa Batangas sa gitna ng isang matinding operasyong militar ng kaaway sa lugar.

Pagdating ng 1985, lumahok siya sa ikalawang kumperensyang panrehiyon at nahalal bilang regular na kagawad ng Komiteng Rehiyon (KR) ng Partido sa ST.

Noong 1988, nabiktima siya ng Operation Missing Link, ang hibang na kampanyang anti-impiltrasyon na ipinatupad sa ST. Isa siya sa mga nailigtas nang irebyu at ipatigil ito ng pamunuan ng Partido. Sa tulong ng mga kasama, nilagom niya ang kanyang karanasan bilang biktima ng OPML at nagsikap na pangibabawan ang mga pisikal at sikolohikal na epekto nito sa kanya. Agad siyang pumailalim sa balangkas ng pag-aayos sa organisasyon, tuluy-tuloy na nagmantine ng ugnay sa mga kasama at gumampan ng mga nakayanan niyang gawaing rebolusyonaryo habang nagrerekober. Habang nagpapagaling, iniukol niya ang makakaya para matulungan sa mga problemang pangkabuhayan at makapiling ang asawa at kaisa-isang anak.

Tuluy-tuloy siyang nagbasa ng mga akda ni Marx, Engels, Lenin, Stalin at Mao, pinanindigan ang mga batayang prinsipyo at pananaw ng Marxismo-Leninismo-Maoismo at pinanghawakan ang rebolusyonaryong kapasyahan. Di nagtagal, muli siyang nagpultaym.

Nang ilunsad ang Ikalawang Dakilang Kilusang Pagwawasto noong 1992, kaagad niyang niyakap ang mga aral at hinarap ang mga hamon nito. Agad siyang tumugon sa panawagan ng Partido na muling pagtibayin ang mga batayang prinsipyo, kabilang ang kapasyahang mahigpit na panghawakan ang armadong pakikibaka. Samantalang nananatili ang kapasyahang muling bumalik sa pagkilos sa larangang gerilya, patuloy pa siyang pinagampan muna ng mga gawain sa lunsod.

Noong 1998, muli siyang sumanib sa BHB. Ipinagkatiwala sa kanya ang pangangasiwa sa isang larangang gerilya na laking distrito sa Quezon.

Sa kanyang muling pagsanib sa BHB at paggampan ng gawain sa pamumuno sa larangang gerilya, hinangaan ng mga kasama ang kanyang matatag na paninindigan para sa rebolusyon sa kabila ng dinanas na mga pasakit at kahirapan. Balewala sa kanya ang mga sugat sa digmaan, ang paminsanminsang dinanas na gutom at iba pang sakripisyo sa pagrerebolusyon.

Mabilis siyang nakapangibabaw sa mga pagsubok at nanatiling matatag sa gitna ng pananalasa ng militarisasyon sa nilipatan niyang larangang gerilya. Di naglaon ay idineploy siya sa Mindoro.

Ang lahat ng mga kasamang nakakilala sa kanya ay saludo sa kanyang matitingkad na positibong katangian. Isa siyang dakilang halimbawa sa mga kasamang naging biktima ng OPML na nagsumikap na makapangibabaw dito, at yumakap at nagtaguyod sa IDKP.

Ang mahigit tatlong taon niya sa Silangang Mindoro ay nagbigay sa kanya ng panibagong sigla at pag-asa sa pagsusulong ng rebolusyon. Sinariwa niya ang maraming karanasang naipon niya sa pagkilos sa Cavite, Quezon-Bikol Zone, Batangas at Laguna. Kinilala ang halaga ng mayaman niyang mga kaalaman at karanasan.

Habang lubos niyang pinahala-gahan ang mga aral ng IDKP, higit niyang nakita at natutunan ang mga pinong punto nito laluna ang mga pagwawasto ng mga nakaraang kahinaan sa gawaing masa at iba pang gawain ng BHB. Hindi siya pinanghinaan bagkus ay nahamon na ibayong magwasto at lalong magpakahusay sa panibagong disposisyon.

Ang lahat ng mga kasamang nakakilala sa kanya ay saludo sa kanyang matitingkad na positibong katangian. Isa siyang dakilang halimbawa sa mga kasamang naging biktima ng OPML na nagsumikap na makapangibabaw dito, at yumakap at nagtaguyod sa IDKP. Matatag siya sa hirap at sakripisyo, walang natutunang bisyo, disiplinado sa sarili at sa pangangatawan, di mapaghanap ng mga kaginhawaan, kung anumang pagkain o anumang karangyaan.

AB

(Hango sa "Mapulang Pagpupugay kay Kasamang Basil, dakilang martir ng rebolusyong Pilipino," pahayag ni Ka Higom Maragang, Tagapagsalita ng Lucio de Guzman Command, Isla ng Mindoro, Pebrero 8, 2004)



Mapait ang asukal sa Negros

May namumuong krisis sa sektor ng asukal. Malaki ang posibilidad na umiral muli ang taggutom sa Negros na katulad ng naganap noong unang hati ng dekada 1980 lalupa't umaasa lamang sa produksyon ng asukal ang ekonomya ng isla. Limampu't anim na porsyento (56%) ng kabuuang 2.2 milyong metriko toneladang (MT) produksyon ng asukal noong Crop Year (CY) 2002-2003 ay galing sa Negros.

Patuloy na pagbulusok ng presyo ng asukal. Walang awat sa pagbagsak ang presyo ng asukal sa pandaigdigang lokal na merkado. Mula P880 kada 50 kilo bag, bumagsak noong Disyembre 2003 ang presyo sa *mill gate* tungong P660. Bumulusok pa ito sa P638 nitong huling linggo ng Enero.

Responsable sa patuloy na pagbagsak ng presyo ng lokal na asukal ang limang pinakamalalaking tagapag-import at mangangalakal sa asukal. Buong kanilang kontrol sa importasyon at eksportasyon, paggiling, presyo, merkado, pinansya, suplay at imbakan ng asukal sa bansa at mahigpit silang nakikipagkutsabahan sa mga ahensya ng guberno. Kabilang dito ang Lucky Two Trading, La Perla, Vision Marketing, Victorias Marketing at Makati Agro Marketing. Kasabwat ng mga ito ang magkapatid na Jose Miguel (Mike) at Ignacio (Iggy) Arroyo na nagbibigay-pahintulot at sangkot din sa malakihang ismagling ng asukal. Nakikinabang rin si Eduardo "Danding" Cojuangco, tserman ng San Miguel Corporation, sa maramihang pag-aangkat ng asukal at sa pagbagsak ng presyo ng lokal na asukal.

Mataas na gastos sa produksyon. Talong-talo sa kumpetensya ang mga lokal na prodyuser ng

asukal sa harap ng pagbulusok ng presyo nito bunga ng pagtatambak ng imported na asukal. Ito'y dahil sa napakataas na gastos sa produksyon. Noong CY 2003, tumaas ang gastos sa produksyon nang P715 (abereyds) bawat 50 kilo bag dahil tumaas din ang presyo ng abono at iba pa, subalit mahigit P600 lang ang presyo ng isang bag ng asukal.

Dagdag pa, nagiging kalakaran na ang "technical smuggling" o ang pagbebenta sa lokal na merkadong pangkonsumo ng murang imported na na asukal (na galing sa Thailand, Vietnam, China at Australia) na dapat sana'y para lamang sa gamit-industriyal. Sa pagpasok ng *pre-mixed sugar concentrate* (ginagamit sa mga *fruit juice* ng mga kumpanya ng pagkain at mga *processor*), naisasaisantabi sa lokal na pamilihan ang tinatayang 120,000 hanggang 150,000 metriko toneladang lokal na asukal.

Dahil sa lahat ng ito, bawas ang kita, mga bisyo at luho ng malalaki at midyum na saray ng mga *sugar planter* (nagtatanim ng tubo). Marami sa kanila na may pagkakautang sa bangko ay narimata na.

Pero ang lubhang apektado ay yaong mga nagmamay-ari ng limang ektaryang tubuhan pababa na bumibilang ng humigit-kumulang 14,000 *sugar planter*. Kulang o walang kapital ang mga ito para mapataas ang produksyon kaya napipilitan silang magbenta na lamang ng kanilang asukal sa lubhang mababang presyo.

Lalong nagdarahop. Bunga nito, papatinding kahirapan ang hinaharap ng 581,000 manggagawa sa mga sentral at repineriya, manggagawang bukid at magsasaka, bukod pa sa limang milyong mamamayan sa bansa (3.2 milyon sa Negros) na umaasa sa sektor ng



asukal para sa kanilang kabuhayan.

Nananatiling mababa ang kanilang sahod kung hindi man kulang, at halos wala silang natatanggap na benepisyo. Ayon sa National Federation of Sugar Workers (NFSW), ang aktwal na minimum na sahod kada araw sa mga asyenda ay mula P30 hanggang P100. Sa papel lamang ang sinasabing P140 hanggang P169 na minimum na sahod kada araw. Habang-buhay din sila sa pagiging kontraktwal na manggagawa at kaswal na trabahador sa pagiral ng imperyalistang globalisasyon. Dagdag pa, bunga ng patakarang *flexible labor*, sinisisante ang marami sa kanila, na napapabilang sa lumalaking hukbo ng mga walang trabaho. Noong 2001, iniulat ng DOLE na mahigit 70% ng kabuuang 210,000 na walang hanapbuhay sa Western Visayas ay matatagpuan sa Negros.

Maiiugat ang partikular na krisis sa sektor ng asukal sa bulok na sistemang malapyudal at malakolonyal at sa lubusang pangangayupapa ng papet na guberno tulad ng rehimeng Arroyo sa imperyalistang globalisasyon. Habang hindi lubusang nababago ang bulok at mapaniil na naghaharing sistemang ito, habang walang tunay na programa sa reporma sa lupa at kaakibat na pambansang industriyalisasyon, magpapatuloy ang kalunus-lunos na kalagayan ng sektor ng asukal. **AB**



Laban sa imperyalistang globalisasyon at gerang agresyon

Mumbai Resistance 2004, matagumpay na idinaos

Matagumpay na inilunsad noong Enero 17-20 ang Mumbai Resistance 2004 Against Imperialist Globalization and War (MR 2004) sa India. Ang apat na araw na pagtitipon ay bahagi ng pagpupursigeng isulong ang isang malakas na pandaigdigang kilusang anti-imperyalista.

Dumalo dito ang mahigit 1,000 kinatawan ng 310 organisasyon, partido at kilusan mula sa iba't ibang bansa na nagkakaisa sa pangangailangang tahakin ang landas ng militanteng paglaban sa imperyalismo at reaksiyon. Sa huling araw ng pulong, nagdaos ng malaking rali at martsa tungo sa embahada ng US sa Mumbai ang ilampung libong myembro at tagasuporta ng mga organisasyon at kilusang nakapaloob sa MR 2004. Ang mga ito'y nagkakaisa na kailangang puspusang labanan ang imperyalistang globalisasyon at gerang agresyon.

Ang MR 2004 ay ambag sa patuloy na pagsisikap na pagkaisahin ang hanay ng mga mamamayang inaapi ng imperyalismo at palakasin ang kanilang pagtutol at paglaban. Sa loob ng apat na araw, dumagundong sa Mumbai ang mga boses ng pagtutol sa pandarambong at pananalakay ng imperyalistang US, ng iba pang imperyalistang kapangyarihan at mga ahente ng mga ito laban sa mamamayan at maraming bansa sa daigdig.

Kumprehensibong sinaklaw ng MR 2004 ang mayor na mga usaping may kaugnayan sa imperyalistang globalisasyon, gera at tunggalian ng mga uri at ang iba't ibang paraan at daluyan ng pakikibaka tungo sa pagkakamit ang pambansa at panli-

punang pagpapalaya. Matapos ang dalawang araw na inilaan sa mga talakayan, nagkaisa, nanumpa at lumagda sa Mumbai Declaration ang mga dumalo sa MR 2004. Idinaos ang MR 2004 kasabay ng pagdaos ng World Social Forum (WSF) na isinagawa doon din sa Mumbai upang ilantad ang dalalang repormismo at pakikipagkumpromiso sa mga imperyalista ng mga namumuno sa WSF. (Sa balitang inilabas sa nagdaang isyu ng *AB*, nagkulang na tukuyin ang tunay na katangiang ito ng WSF at ang pagdaos ng MR 2004 bilang pantapat dito.)

Maraming pwersa sa WSF ang tunay na nagnanais na labanan ang imperyalismo. Subalit hindi nila matamo ang kanilang hangarin dahil palagi ang nababalahura ang WSF sa walang katapusang mga diskusyon at debate. Ang kanilang inisyatiba ay nasisikil ng kawalan ng panloob na demokrasya rito.

Dinodominahan ang WSF ng mga Trotskyista, mga repormistang sosyal-demokrata at mga burukrata ng mga NGO. Nakikipagtulungan ang mga ito sa mga operatiba ng CIA ng US at pinopondohan ng Ford Foundation upang tabunan ang mga pundamental na usapin sa



imperyalistang pandarambong at pagsasamantala at hadlangan ang landas ng militanteng paglaban ng mga mamamayan.

Itinaguyod at pinondohan ng mga imperyalista ang pagbubuo ng WSF bilang reaksiyon sa mga naganap na militanteng anti-imperyalistang kilos-protesta laban sa World Trade Organization sa Seattle noong 1999 at pagbubuo ng militante at anti-imperyalistang International League of Peoples' Struggle (ILPS) noong taon ding iyon.

Sa paglalantad sa tunay na katangian ng WSF, hinihikayat ng MR 2004 ang mga pwersang naghahanap ng tunay at makabuluhang paraan ng paglaban sa imperyalismo at reaksiyon na makiisa sa mga militanteng pagkilos.

Tinukoy ng MR 2004 ang imperyalismo bilang pinakaugat ng mga paghihirap at pang-aaping dinaranas ng mamamayan at mga atrasadong bansa sa daigdig. Naninindigan ang MR 2004 na ang imperyalismo ay narapat lamang na lubusang ibagsak ng mamamayan ng daigdig.

AB

Welga ng mga drayber at opereytor, inilunsad

PINARALISA ng mga welga ng mga drayber at opereytor ng pampublikong sasakyan sa Metro Cebu noong Pebrero 10 at sa prubinsya ng Bulacan noong Pebrero 16.

Ang welga sa mga syudad ng Cebu, Lapu-Lapu at Mandaue ay pinamunuan ng NADSU (Naghiusang Drayber sa Sugbo). Naparalisa ang 98% ng mga byahe sa araw na iyon.

Pinamunuan naman ng PISTON-Bulacan at Bulacan Transportation Alliance (BATAS) ang welgang pantransportasyon sa Bulacan, na halos lubusang nagparalisa ng pampublikong transportasyon sa prubinsya. Dagdag na pasahe rin ang hinihingi ng nagwelgang mga drayber at opereytor. Bunga nito, napilitang magdeklarang walang pasok ang

halos lahat ng mga paaralan sa buong prubinsya, mula primarya hanggang kolehiyo. Lumawak ang welga hanggang Pampanga at Nueva Ecija.

Tumaas ang presyo ng krudo mula P13.75 kada litro noong Oktubre 2000 tungo sa P18.41 nitong Pebrero, pero walang kaakibat na pagtaas ng pasahe. Kaalinsabay nito, bumagsak nang 36% ang kita kada araw ng isang karaniwang drayber mula P186.25 noong 2000 tungong P119.75 noong nakaraang taon. Hinihiling ng mga drayber na magkaroon ng P1.50 hanggang P2.00 dagdag sa pasahe ng pampublikong sasakyan sa unang limang kilometro at pagkatapos nito, ng karagdang 37 sentimo sa Metro Manila at 18 sentimo naman sa mga prubinsya.

Pananahimik sa kasong rape, binatikos

BINATIKOS ng Migrante International ang pananahimik kundi man pakikipagkutsabahan ng Manila Economic and Cultural Office (MECO) sa isang nag-eempleyo sa kaso ng panggagahasa ng isang Pilipinang *domestic helper* (DH) sa Taiwan. Nagsampa ng kasong panggagahasa si "Rose," isang DH, laban sa amo niyang si Elmer Fung, dating mambabatas ng Taiwan. Sa halip na tumulong sa pag-uusig, tahimik na sinuportahan ng MECO ang agad na pagpapauwi kay Rose. Tinataya ring alam ng MECO ang panunuhol ni Fung para patahimikin si Rose. Hindi man lamang nagsampa ng protestang diplomatiko ang Pilipinas, sa pagdadahilang walang relasyong diplomatiko ang dalawang bansa.

Depisit sa kalakalan, lumobo

LUMAKI nang anim na beses ang depisit sa kalakalan ng bansa kumpara sa naitala noong 2002. Umaabot sa \$1.697 bilyon ang depisit sa kalakalan ng Pilipinas mula sa \$218 milyon noong 2002. Bunsod ito pangunahin ng pagdami ng iniimport na mga produkto ng bansa. Isa sa mga nagtala ng pinakamalaking paglobo ang pag-import ng mga elektronikong pyesa na ginagamit para sa pagkukumpuni ng mga semimanupakturang pang-eksport.

Mining Act, pinatitigil

HINAMON ng Cordillera People's Alliance (CPA) ang rehimeng Arroyo na agad na ipatupad ang desisyon ng Korte Suprema noong Enero 29 na nagsasaad na di konstitusyonal ang mayor na mga prubisyon ng Mining Act of 1995. Pinapayagan ng Mining Act ang 100% pag-aari ng mga banyaga sa mga minahan. Kaugnay nito, nanawagan ang CPA na ipawalambisa ang lahat ng mga kontratang pinasok na ng gubyrno sa mga dayuhang kumpanya ng pagmimina.


Taliwas ang desisyon ng korte sa Executive Order 270 na isinabatas ng rehimen upang walang sagkang maipatupad ang Mining Act.

Pagpasara sa Bombo Radyo sa Isabela, mariing kinundena

MARIING kinundena ng National Democratic Front-Northeastern Luzon (NDF-NEL) ang dinastiyang Dy sa pagpapasara nito ng Radyo Bombo dzNC-Cauayan noong Pebrero 17. Ayon kay Salvador del Pueblo, tagapagsalita ng NDF-NEL, ito ay pagyurak sa kalayaan at karapatan ng mamamayan sa malayang pamamahayag.

Daan-daan ding mamamayan ng Isabela sa pangunguna ng Bagong Alyansang Makabayan (BAYAN-Isabela) ang nagmartsa patungong city hall ng Cauayan City nitong Pebrero 20 upang ipakita ang kanilang mariing pagtutol sa panggigipit ng pamilya Dy. Ayon sa BAYAN, magsasagawa ng serye ng mga rali ang iba pang grupong multisektoral upang buksang muli ang istasyon ng radyo.

Hindi umano nakapagbabayad ng buwis at may mga nilalabag na ordinansa ang Bombo Radyo kaya hindi ito binigyan ng pahintulot na mag-opereytor ng alkalde ng Cauayan City na si Ceasar Dy. Pangalawang beses nang ipinasara ng alkalde ang dzNC dahil sa matinding pagbatikos nito sa korapsyon, warlordismo at awtoritarianismo ng dinastiyang Dy, na matagal nang kumokontrol ng reaksyunaryong pulitika sa Isabela.



ANG

Bayan

Pahayagan ng Partido Komunista ng Pilipinas
Pinapatnubayan ng Marxismo-Leninismo-Maoismo

Taon XXXV Blg. 4
Pebrero 21, 2004
www.philippinerevolution.org

Editorial


Marami pang liko't ikot ang daraanan ng usapang pangkapayapaan

Malisyoso, mapanlinlang, taksil. Ito ang mabibigat na salitang binitawan ni Luis Jalandoni, tserman ng *peace panel* ng National Democratic Front of the Philippines (NDFP) sa pagtatangka ng rehimeng Arroyo na lapastanganin ang kasunduan sa Oslo, Norway na kalalagda pa lamang ng *peace negotiating panel* ng NDFP at gubyerno noong Pebrero 14.

Ang kasunduan, na itinuturing na ika-11 mahalagang kasunduang pinirmahan ng dalawang *panel* mula nang masimulan ang usapang pangkapayapaan sa pagitan ng NDFP at GRP noong 1986, ay nilagdaan matapos ang apat na araw na negosasyon. Ito ang una sa serye ng mga pormal na usapan matapos itong suspendihin ng rehimeng Arroyo noong 2001.

Inilahad sa kasunduan ang kapasyahan ng magkabilang panig na isulong ang prosesong pangkapayapaan at harapin ang mga ugat ng armadong tunggalian. Sa partikular, pinagkaisahan ng dalawang panig na resolbahan ang usapin hinggil sa pagbabansag na terorista sa PKP, BHB at kay Jose Ma. Sison, punong konsultant ng NDFP *peace panel*. Gagawin ito alinsunod sa mga probisyon ng The Hague Joint Declaration, ng Joint Agreement on Safety and Immunity Guarantees (JASIG), ng Comprehensive Agreement on Respect for Human Rights and International Humanitarian Law (CARHRIHL) at iba pang bilateral na kasunduan sa nakaraan.

Bago umusad ang usapan, nagkaroon ng malaking



kontrobersya at mahigpit na gitgitan sa naturang pagkakalista na tumagal nang halos dalawang araw. Iginiit ng NDFP panel sa GRP panel na ang aktibong pangangampanya ng rehimeng Arroyo kaugnay nito ay taliwas sa diwa at nilalaman ng lahat ng dati nang paglabag sa pambansang soberanya ng bansa at taliwas sa diwa at nilalaman ng lahat ng dati nang pinirmahang kasunduan sa pagitan ng NDFP at GRP.

Sa pinirmahan nitong pinag-isang pahayag noong kalagitnaan lamang ng Enero, sumang-ayon ang GRP na gumawa ng mga ligal, pampulitika at diplomati-

**Mga tampok
sa isyung ito...**

**Mga aktibista ng kara-
patang-tao, pinaslang
ng militar**

PAHINA 4

**27 armas, nasamsam
ng BHB sa mga
taktikal na opensiba**

PAHINA 5

**Mumbai Resistance
2004**

PAHINA 11